

呂
子
評
語

呂子評語正編卷三十七

孟子盡心下

孟子曰春秋無義戰章

首節

章世純文云云。評于子譏其引據義例。謂不能盡舉。且未知春秋書法果如是解否。是也。然此題不舉案以斷義。則無字如何判決。若必欲求春秋書法之果如是解。而後下語。則三傳俱可疑議。又何從得真解也。但求其理不悖於聖人之道耳。

孟子曰盡信書章

孟子教人信書。貴得其大意。不要字句上去傳會。且如咸丘蒙說北山之詩。其始似拘。然遂使天下以臣父爲可。其終則賊。故謂盡信則不如無耳。今之後生。輕於非詆先儒。村學究便思著書。

翻案。須知孟子究不曾抹却血流漂杵句也。

首節

唐順之文傳疑本史氏之體。容非綜核之真。愛憎出一時之情。或有揄揚之過。評講出文勝則史之故。見古來文章定有過實處。理本如此。文蓋學者誦其言而斷之以理。無病於書也。固把柄在此。

差在盡字。不在信字。所以盡者。胸無是非也。不盡信者。正爲信之篤也。

孟子正恐人不信書。而言讀書當得其大義所在。若徒求之辭句。反以小者惑其大者矣。謝上蔡博舉史傳。程子謂其玩物喪志。及見程子讀史書。字句不遺。甚以爲疑。後乃悟此理。每舉以教學者。正可與此意參看。程子改大學古本。朱子辨詩序。此能篤

信書者也。伯安舉良知而非孟子之旨。舉致知而非曾子之義。此不信書者也。會得此意。方不負孟子此章心切。

孟子此章。專爲不善讀書人害道說法。一種拘文牽義。支離於字句而反病大旨。如近世蒙存淺達等講章是也。其一種穿鑿破碎。自以爲得古人不傳之奇。而深害於道。如郝敬之經解。季本之私考。近日黃石齋之易象正洞璣等經說。是也。此皆就文字生病。卽可以本文正之。其害猶小。至若陰主邪異之教。而陽借聖賢語言文字以飾其說。如致良知體認天理主靜知本慎獨體等宗派。言皆聖賢之言。而理非聖賢之理。惑亂至此。雖明眼難辨。害道乃不可勝言矣。然其誠淫邪道作用。總止在語言文字之粗跡上生狡獪。而今之學者。於聖賢之書。亦止在語言文字之粗跡上作生活。聞其說。便似與聖賢之書無異。鮮不靡然。

信之而反不信正學者皆緣於義理無見而讀書但知有語言文字之粗跡也。若能於書之義理是非研究得聖賢真正指歸則一切語言文字皆有下落。誰能改頭換面以惑亂我哉。孟子所戒止爲盡字不好。不是教人不信書。盡者正指語言文字之粗跡。雖經傳不能無文法之病。讀書不於義理是非上斷之。將語言文字之粗跡與聖賢指歸混淆不分輕重。則必反因粗迹而疑及指歸。如泥血流漂杙。必疑武王之力簋不仁矣。卽讀此章書者亦須見孟子指歸而不執語言文字之粗跡。不然如陽明謂反之吾心而非。雖言之出於孔子不敢信也。彼直是不信書耳。遂爲無忌憚之言。豈非不如無書一句粗跡誤事耶。

吾於武成節

於世務而講幹旋者必小人也。於學問而講幹旋者必小儒也。如

孟子云吾於武成取二三策而已。一何光明磊落直截痛快。作文者曲爲之說曰。不盡信正所以盡信。意若孟子于此言有所太甚。而必待我之爲幹旋者。吾不識孟子何如人。而待公等幹旋耶。朱子之於禮。斷然不信古本大學。於詩。斷然不信小序。何嘗依違囁嚅于其間哉。其所以不依違囁嚅者。以其務求此理之當。初非有立說翻案之私意存焉也。惟陽明肆詆考亭。而又恐天下之疑其異而不之信也。乃爲晚年定論以幹旋之。改竄割裂以就其說。思以塗天下之耳目。卽此爲欺天罔人矣。尚何論其學乎。佛氏著說。多援聖經。闢邪如韓歐程朱。反扯入護法伽藍。宗杲謂張侍郎云。足下得此把柄入手。卽用儒家言語。改頭換面。接引後學去。無非此故智。吾故曰。凡講幹旋者必小人小儒也。

孟子不盡信書。必有深信處。今試讀武成篇。諸公且道孟子所取二三策安在。

仁人無敵於天下節

當時必有爭地殺人者。藉口武成。故孟子發盡信書不如無書之論。人皆貪發首節。輕點末節矣。

失僅文義耳。而關係不小。所以辨也。

孟子曰好名之人章

當時好名人難辨。能讓千乘。安得不驚世。若近日何用如此口談性命之人。皆失色于簞豆者也。其妻子生徒且心鄙之。況能欺天下乎。然雖高低迴絕。總只是此一點心腸裝扮。古之名高則好者亦高。今日名低則好者亦低耳。

孟子曰聖人百世之師也章

此章專就聞風興起處。指出清和之聖。將來鼓舞天下人。自古未有以聖人目夷惠者。有之自孟子始。當楊墨鄉愿陷溺頽靡。非得一番振興。不足以救之。惟夷惠行高迹著。以之廉頑立懦。寬鄙敦薄。效速而及廣。故專舉以立之表。是孟子千古特識。此章之微旨在此。但有揚而無抑。故不但與養氣大成二章之論不同。並與隘與不恭章專論夷惠者亦別。看朱子答問兩條。正發明所以不及孔子之故。非於此章補足願學意也。隘與不恭章言外有願學意。此章並無言外。百世之師。正極力推崇以鼓舞人興起。若言外別出不足之意。直令全理索然矣。然則孔子非興起百世者乎。看孟子凡說聞風。但及夷惠。而不及伊尹孔子。伊尹有事功。不用風。孔子道大。不可以風言也。聞孔子而興起者。止有一孟子。後只有程朱耳。豈可望之人人乎。惟夷惠以高

行偏勝至聖人故有風。風便易動人。春之和。秋之清。皆風也。故變化萬物最速。四時元氣流行。豈得以風當之哉。故此章言外無孔子。

論夷惠有指其弊言者。隘與不恭是也。有比論聖人之極者。願學孔子是也。有引其同道者。趨一是也。有微顯闡幽以見各聖未嘗不全者。柳下之不易介。伯夷之不念舊惡是也。各章自有義絕不相通。此章不但不指其弊。不論其極。不引其同。并不闡聖德之全。正要就他偏勝處。見其制行之高。足以感動百姓耳。

孟子學孔子而屢歎夷惠何也。朱子曰。薑桂大黃。雖非中和。然去病之功爲捷。參苓芝朮。有養性之益。而緩急伐病。未必優於此。所以屢稱夷惠而不及孔子也。今日人品文字。皆不能卓然有所樹立。而輒講渾融圓活。正犯麻痺狂譫之疾。非大有以滌盪

之雖參術不能補益也。

孟子此章意致濶遠。句句別有精思。不可捉摸。

卽今日便是百世之上。但不曾奮耳。二程十四五脫然欲學聖人。朱子自少謂聖人可至。今人那有此志識。

孟子曰仁也者人也章

此章大意是解釋仁道二字。歸重人身爲正。從來有重仁字者。有重道字者。有重人字者。重仁見此理本然親切。重人見責重踐形意。朱子兩下互說。正是合字之旨。故二說皆可。若重道則是倒說。非本義也。言字固重。然論之如是。體之亦如是。非有二也。以仁之理合於人之身。有人倫日用之事。卽爲君臣父子之道。人不合仁。無從爲道。不合仁與人。亦無從言道也。至講章謂上句未有合意。至下句方合之。以見所以爲道。其說極支離。韓求

仲遂謂首句便自合矣何必屋上架屋其僂侗更甚仁也者人也此句說道理自然人必合之而後爲道必合而言之而後明其爲道首句中連合字也說不得

仁與道分合處尚易解仁與人分合處最難說得親切不難在合併難在分析仁字人字道字各有本位

此與中庸仁者人也義絕不同看中庸下句便云親親爲大又對分出義理來故人字指生意愛理而言此下文云合而言之道也可見人字指所以爲人之全理而言看白文自分明今一概作中庸義解不但仁字誤并道字亦說不完全矣

仁者所以爲人之理人身乃仁之體質以此理合此體質言之方見得道理出來

陳際泰文合性與知覺有人之名合虛與氣有道之名評張子言

心故曰合性與知覺。人則兼形體矣。虛與氣是性之名。非道之名。此皆不懂先儒之理。而妄爲改換。斯不通矣。

艾南英文道也者。物恃以通。通物無私而名之曰道。**評**仁者所以爲人之理。合而言之便是率性之謂道。都就人身本然而言。非謂通於人物也。只坐看得仁字粗淺。以因緣交接爲道。竟將此理都說在外面。如其言將靜坐一室。不與物接。則竟無仁無道耶。

金聲文其自爲合也。超其環外。可以出世而游其環中。亦卽可以經世已矣。**評**此是和尚胡說出世經世原無分。且世如何出。只有一涅槃耳。

附此章文

體仁卽所以盡道。貴于人見其合也。夫仁與道皆因人而得名者。

也。知所爲仁。卽知所爲道矣。言者宜得其合哉。嘗謂上下定位。使無人焉。成能于其中。則理之顯藏。可以不設。又安有紛然不一之名哉。惟予茲藐焉。混然中處。聖人因爲之推其所由。生曰。是有其本然者焉。性始之德不一。而統之以仁。仁兼衆德也。又推其所由成。曰。是有其當然者焉。日用之理不一。而統之以道。道涵衆理也。聖人又何樂乎多爲之名哉。固欲人返而得之。卽推而行之已耳。乃名立而說紛。羣爭乎其名。而漸生其命名之實。於是乎人與仁離。卽仁與道離。不寧惟是。並道與仁離。異流者起。病支離之學。而且謂聖賢文字之銅也。豈非言者之過哉。蓋天下物在而則麗焉。未有物之先見則之一神。既有物之後見。則之兩化。要亦爲之論晰則然。而使無是物。則則亦難稱。固無分先後者也。氣形而理付焉。觀氣於至虛。得理之冲漠。觀氣

於至實得理之流行。要亦爲之研究則然。而使離是氣則理亦難見。固無分虛實者也。今欲明所謂道。當先明所謂仁。仁必極乎廣被。此猶從施暨言之也。百骸之理。而疾痛之必應。此憫恤隱之所自生矣。別聲被色。無不見天地之心。有返觀而識其充周耳。仁必驗乎散殊。此猶從推致言之也。一體之私而愛養之必至。此太和變化之所各正矣。血氣心知。無不通性命之故。有當前而悟其純全耳。蓋仁也者。人也。仁之理虛。必附於人以自著。而究當仁所得著之處。又不可以仁名。抑人之質滯。必存其仁以自全。而及夫人當既全之時。又不僅以仁顯後之人。遂欲於人之外求仁。而又於仁之外求道。此所謂言者之過也。夫仁以體道。而所以能體者。惟人爲之凝聚也。故就仁而言。元善一虛位耳。合之於人。則遇尊而作忠。遇親而作孝。羣倫政教之

大皆吾心不煩擬議之端。卽吾身不容闕略之事。非體用之一原哉。人以弘道而所以能弘者。惟仁爲之曲成也。故就人而言。網緼一游氣耳。合之於仁。則曰明而及爾。出王曰旦而及爾。游衍經曲威儀之細。皆吾性不假強合之迹。卽吾學不能損益之天。非顯微之無間哉。故不知其合。豈惟仁也。由仁之有裁制而義出焉。由仁之有品節而禮出焉。由仁之有知覺而智出焉。由仁之有貞固而信出焉。言之將不勝其分。苟知其合。止有此人也。義卽人之所宜也。禮卽人之所履也。智卽人之所知也。信卽人之所守也。亦且盡歸於一。無非仁也。無非人也。合而言之道也。

貉稽曰。稽大不理於口章

首二節

趙衍文今所貴乎士者何也以其爲聖賢所取則不復爲庸衆所
子評今人欲兼收之宜遂不爲聖賢所取也

或謂青天白日奴隸知其清明孟子此言終是激論此其說尤與
於小人之甚者也吾試以後事論之自漢以來道莫盛於考亭
而考亭至今不理於口矣自宋以下禍莫烈於新建而新建至
今理於口矣且如論朋黨東漢之世以李膺范滂爲是其得更
理於曹節王甫之口乎如論儒釋吾以儒爲是其得復理於釋
者之口乎人惟以理於口爲純粹中正于是于門戶始有調停
兩是之說於學問始有異同合一之說此非小人之尤者乎故
吾直斷以爲世之爲聖人者斷斷乎未有或理於口者也然斯
言亦且撓衆喙矣

詩云憂心悄悄節

孔子之苦。孔子知之。文王之苦。文王知之。

善學孔子文王者。當學孔子文王之自理。此是孟子言外正意。不然。則是人言不足畏也。

孟子曰。賢者以其昭昭章。

陳子龍文云云。**評**昭昭在明明德上說。使人昭昭。謂教化之行。卽新民也。非止謂明事機齊號令。大樽有慨于崇禎間時局而爲言耳。

自私用智非昭昭。

陳臻問曰。齊饑章。

陳臻亦疑不可。其不可從利害來。孟子自有其不可。此不可從是非出。是卽喻利喻義之辨。亦卽爲己爲人之分。今人纔開口纔舉足。便只有一箇成敗利鈍橫於胸中。如何得人品事功耶。

孟子曰口之於味也章

此章專爲當時談性命者。如告子一流。竟以氣卽是理。一滾說去。不復知其分處。其弊至以人欲爲天理。如今日之講學者。兩兩開說分明。君子不謂。謂字極重。

原是道性善。與關生之謂性之言耳。

道理愈分析則愈明。如性命本是一原。被孟子判作二。又將性也。命也不謂性。不謂命。寫作四。辨析毫釐。如蘭絲牛毛。一針不亂。則道理自切實。而所謂一原處更分明矣。

讀孟子此章。方知程朱理氣分合之義的確不可移易。

章世純文云云。只一箇性字沒榘柄。以下道理總無準的。有時

道著便佳。有時亂道便謬。此病于子說他讀書未廣。彼却不服。只是他看得孔孟程朱與老莊瞿曇達摩儀秦嵇阮及近日陳

獻章王守仁李贄等說數總是一樣可彼可此絕無是非邪正或反倒亂亦得則讀書越廣越不可救矣此病不止一人正嘉以後文人學人無不爾也

首節

須見不謂性卽是天理當如此不是君子強制天性也

仁之於父子也節

只義便是性非義之上更有性也是則從非則諫可則進否則退明則良昏則死之類乃所謂義非血性真切之謂也人於義字看來終與仁字不同卽告子內外疑團也

中庸尊賢爲大義也而下節更云不可以不知人蓋尊不難尊非所當尊則義失故必重在知人知人卽智也智帖賢說正是此義

智之於賢者。如晏嬰不知孔子。豈非命耶。

孟子一部書。只是有性不謂命。佛老荀揚都見不透。此所以亂道。後來昌黎爲性有三品之說。雖稍近理。然到底只說得氣質之性耳。

浩生不害問曰。樂正子何人也。章

可欲之謂善節。

孟子說天爵。便云樂善不倦。樂善處正是人性之同。性善故也。從此到聖神。亦只是善上做去。然善在天下爲實理。而在人爲實心。有實心。則實理始爲我有。此孟子道性善而又必稱堯舜勉人之本旨也。

可欲從公共自然處說來。乃得其妙。此所謂本天也。

義重可字。可字從公共自然處看。離可字講欲字。便多混說矣。

可字與欲字拆離不得。

陳際泰文語善而待去欲。是無以制欲而用於有欲者云云。**評**此欲字。却混私慾之欲。不可與可字粘連者也。如其說。便入二氏宗旨矣。**張愛先**題疑我心者二十年。今日始解得。**評**大士此文。語語流露教外別傳。與柴柵經繳之旨。總以無善無惡爲極。則勉強附麗儒門之說。直是挂搭不上。看受先評。可知當時一班名士。總不離禿丁位下求方便。言之可哀。

之謂善三字語氣。原指人品名目。註中天下之理四字。解可欲二字耳。故接句卽下其爲人也。煞句則可謂善人矣。清出本義。只講天下之理。不帖著善人。則不知孟子之所指矣。

有諸已之謂信節

有字從善字來。

其人便謂之信。

大而化之之謂聖節

自大至聖相去尚遠。實有工候界級。可見到聖與神。其辨甚微。不得強分兩等。

聖而不可知之之謂神節

不可知。兼內外說。

不可知。故曰神。非如神之謂也。

陳際泰文。天下有畸人焉。妙其一偏。且與來事爲通也。云云。**節**不可知。專指此在異端亦淺陋矣。且此豈聖之一偏。○神止言其妙。妙止謂其難測耳。大士意中。便以鬼物幻術相形類。何其陋也。

樂正子二之中節

二之中中字。在合縫之處。卽離之間。精進人刻刻在中字中。但地位則曰異耳。

孟子曰逃墨必歸於楊章

此章說盡聖賢婆心。非針椎籠絡作用之比。

從來異氏有箝椎棒喝之法。勸誘籠絡之術。而吾儒無有。所以智愚強弱之民。盡爲彼所收。而反以儒爲淡泊也。然爲所箝椎棒喝。勸誘籠絡之民。而使其一有悔心。則未有不反而以吾之淡泊爲有味者。何則。人之本心。不可泯沒。而先王之法。又皆待以至誠。故惟在受之者有其人耳。特疑孟子時。闢楊墨者惟一孟子耳。孟子方患天下之不能距楊墨。故大聲疾呼曰。能言距楊墨者。聖人之徒也。奈何。卽嫌其太甚乎。不知此正如捕盜之尉。方其追跡掩擊之時。諄諄戒諭。勿令殘殺。便要打算。所以受降。

編置之法耳。

趙衍文：昔之楊墨，類多堅忍不拔之操，足以自有其千古其氣方張，則其徒日盛，故雖勢孤援絕，而身不辭，好辨之名，**詔**待此等人，只有一法，曰殺耳。朱子看五祖六祖像，以爲必作綠林者，謂此**文**。今之楊墨，漸有渙散無聊之象，相與危疑而莫定，其勢已衰，其情亦已竭，則惟尊聞行知，而功已在能言之列。**詔**此等可憐，待之亦只有一法，曰愛耳。

孟子曰：有布縷之征，章。

三有原是常額，其變通全在用緩耳。

用一緩二，上三句中本具，不是舊制並征。君子爲之，更張加恩也。只因後來一時併取，民力不堪，故孟子言此意中先有用二用三而發。

或云以催科爲考成爲有司者知愛功名不知愛百姓萬曆間江陵相公爲之備也此言真可痛然吾聞當時有司尚有寬法以甦民者朝寧亦不之罪也後來有加派有預征而民始不堪矣然吾見尚有漏網之頑民也後來良善無絲毫之敢逋而官蠹豪猾侵蝕動以千萬而民更不堪矣

天下賊民酷吏不消他惡只急公奉法四字足以殘殺天下有餘罪則歸君利則歸己美官多錢皆以一路之哭得之考成課最繇此其選也

孟子之滕館於上宮章

或問之曰節

殆非也看下一殆字滿肚皮疑團不解在

孟子曰人皆有所不忍章

人能充無欲害人之心節

不忍不爲二字。尚渾淪。又就其中指出最淺近平易者。令人箇箇承當。無可遁脫處。

金匱要略充之而朝廷之上。可以禮樂刑政殺民物。草野之下。可以學術議論殺人心。凡恣一身一時之快。而不顧天下萬世之流毒者。莫非害人也。**評**既知此義。奈何先生又勸人讀傳習錄耶。得毋認賊作子。反以正學爲頭敵耶。篇中句句追入人心去。緣其於已分上。實曾用工夫來。不同勦襲欺人者。然極其微妙痛快。却只是黃梅老婆心。與孔孟原頭有別。又不可不知。

此節緊承首節仁義並起充字。下兩節則又因充無穿窬之義而極推之。

人能充無受爾汝之實節

無受之實有氣上事有理上事。孟子所發明專指理耳。氣之無受不可充也。充之則必至於盜賊叛亂。豈無穿窬之心之所推乎。

孟子曰言近而指遠者章

首節

不肖言近守約亦大有習氣病源在。

須知近遠約博原只一理。此而字實義而字若寫作神妙奇特。便非。

他處而字勢側重在下半截。此處而字勢歸重在上半截。蓋非謂近約者貴乎遠博。謂遠博而卽在乎近約。乃所以爲難也。如此纔點得善字醒。

守約而施不博。約非其約。施博而不本於守約。博非其博。兩邊打落。方見此節而字之義。

君子之守節

陳際泰文天下之事不可以相擾也必受之以廣大居之以深靜云云評此黃老之言也堯舜到底只一兢業恭己耳文侯旬男衛區畫既宜而獨以祭祀禮樂爲政事焉而謹持之評約處豈在此脩其身須有真實工夫本領天德王道是甚精微却只說得怎樣粗淺可見朱子告君必正心誠意後世秀才猶厭聽何況當年孝宗也

孟子曰堯舜性者也章

動容周旋中禮者節

非以干祿不過極言其自然無意耳非從得祿起論也著眼只在祿字故是秀才小見識且此下二節已離堯舜湯武言矣膠住堯舜立說則哭死而哀句如何帖合唐虞事實下節亦難著湯

孟子言齊魯
武身上也。

君子行法以俟命而已矣節

此命字指氣數之命言。非性命之命也。以漸近自然爲解。乃至命非俟命矣。

孟子曰說大人則藐之章

實見得夫子溫良恭儉讓之意。方識此泰山巖巖氣象。若徒作虛驕客氣。則戰國縱橫之士。如顏蠋王斗之徒。亦能爲之。彼其意中正有大人之赫赫在。如醉人之必強謂不醉耳。又何嘗藐也。孟子曰養心莫善於寡欲章

此欲字。非嗜欲沉溺之欲。卽口之於味也。一節道理。孟子所云性也。堯舜所云人心也。乃凡人之與生俱生。雖聖人亦必不可無者也。故謂之寡。寡者。謂不爲其所誘溺沾戀。則道心爲主而仁

之於父子一節道理不走作。乃所謂存焉者也。謂之有存焉者。不止是虛靈不測之物存。有與之存焉者耳。荆川文所見亦止。到得虛靈不測邊。任其咎王。遵嚴書。自謂四十年前所聞於經書師友。與其意見窺測者。皆爲隔壁聽話。於是放捨抹掇。見得些影子。原是徹天徹地靈明。混成東西。至謂孔顏一生工夫。只完養收攝得此物。其說之可笑如此。故知明明德不講得止至善一綱領。雖坐破蒲團。踢翻醋甕。未有不蹉入鬼窟者也。

須知口鼻耳目四肢渾是一團天理。纔說欲。便是不好。此與虞書人心不同。故周子之說。謂當寡之又寡。以至于無。而朱子又曰。只漸減少。便存得此心。則周子之說固精。而朱子之說又較密。萬章問曰。孔子在陳章。

狂者又不可得節

楊以任文狂又窮於天下云云評因萬章問在陳之言止及狂者孟子引孔子之言兼言狂狷故又發明此說非揣量世界至此也不可得明說孔子求其人而不可得如文中云解爲狂者不得行於天下聖人傳道豈因天下人不可而遽思別授哉且又不可得從上中行不可必得說來故曰又如所云則中行亦天下所窮耶不辨而知其謬矣

楊維斗狂者又不可得此句回護甚難上云琴張曾皙牧皮皆狂者也此云又不可得將置諸賢於何地評琴張曾皙牧皮固狂者一流然終不知所裁不足以與大道之傳故曰不可得此句又何須回護如顏子早夭不及見其大成卽不算與之不然不得中行句又置顏子於何地

曰何以是嚶嚶也節

人都看鄉愿做庸鄙一流。非也。其見頗高。其術甚狡。以庸鄙之言行。愚弄惑亂天下耳。老釋正得此秘。故易於動人。因思嵇阮之徒。似乎狂狷行徑。也只是鄉愿法嗣。與狂狷正自背馳。皆從生斯世也。爲斯世也。此二句得宗者也。

君子反經而已矣節

君子原兼堯舜孔孟言。堯舜有堯舜之經正。孔孟有孔孟之經正。人因見庶民字。便將君子專屬有位者偏矣。玩通章與下章自見。此全部孟子歸結微旨也。

反復之也。正復其所也。聖賢大聲疾呼。驚世震俗。到得此理。復明原是人人所自有。不是聖賢別將一件換去。也不是別有所以脩改加減於上面也。惟其如此。憑他管商申韓儀秦佛老告子象山公甫伯安百般惑亂。日新月盛。到底漸滅他不得。今日崛起

便在只恨無君子反之使正以奏興起之功耳

經在天地間。亭亭當當。本無不正。只緣異端惑亂之後。故必反之而後正耳。

正字中分量亦復不同。君子反經。必須到盡處。方是孟子之所謂經。正如漢以後。闢二氏功。莫大於韓退之。然於經尚粗。有正不盡處。必至程朱而後謂之正。卽程門弟子。於經亦微有不盡處。得朱子爲之詳辨。而後無所不正。故反字在經字上。正見人人可以用力。反得一分。卽有一分之興。至正字在經字下。非孔孟程朱之功。不足以當之也。見地到此者鮮矣。

難處只在經正民興。到得無邪慝。却是一滾話。觀註自明白。

經正民興。原在辨明學術上說。玩註下是非明白。無所回互八字。則正興都就知一邊看。若泛作政教感化講。失之遠矣。反經之

任堯舜與孔孟共之能言距楊墨者卽君子也吾輩今日猶得執此理以闢邪說亦賴程朱一番經正耳

經與民原流合一故正與興氣息相關此卽性善之旨也正者正其善興亦興其善君子不是別有箇道理只就此中分辨出似善而非者耳異端之亂道亦未嘗敢道箇不善故只好說箇無善無惡爲本體也今人動云佛氏亦勸人爲善陽明亦教人爲聖人然則墨子一書亦言脩身尚賢以治國平天下同是堯舜同非桀紂韓退之且惑其說矣何以孟子獨斷箇無父禽獸之極罪乎故後世講學只是是非不曾分明纔不分明便經不得其正身入於邪惡而不自知其非也

只在似是而非處反之爲正耳

今人最怕是是非二字一切要包羅和會圓融含饀纔辨白分明

便曰矯激曰刻露。凡做文爲人。無不如此。甚至三教必求合一。朱陸必求同歸。推其意。並楊墨告子。與孟子不分優劣爲得。此正是鄉愿之術。中於人心。淪肌浹髓。牢不可破。看孟子一生用力。亦只於是非二字分別得盡。其所謂經正。直不許似是而非者。絲毫假借夾帶過去耳。

註中興起於善最宜玩。善卽經也。富強之說精。則民興於功利。禍福死生之說精。則民興於二氏。科甲之說精。則民興於時文。速化巧宦之說精。則民興於無恥。彼皆發憤竭力以圖之。未始非興也。但不興於善耳。

衆皆悅之四字。便是興字命根。要之庶民原無日不興。悅鄉愿處亦誤以爲善耳。而不知其非也。若有真善式樣示之。其悅更可知矣。孔孟不再。無怪其惑于佛老。程朱不生。無怪其溺於陳王。

天下紛紛。總緣未得箇反經君子耳。於民乎何尤。

或云經正則庶民興。句是過接語。只宜輕點。予不謂然。君子與邪。慝所爭者。正此庶民耳。卽以文字喻之。今日俗爛墨腔。不顧書理。相習成風。此邪慝也。只爲天下秀才。隨人脚跟。不能知恥自振。此庶民不興也。有識者從而憂之。思得一二實學奇才者出。使之翕然興起。亦甚易。此孟子好辨正人心本懷。卽孔子思狂狷章意也。

毀狂狷者。只有鄉愿。破鄉愿者。亦必須狂狷。望君子曰反望庶民曰興。皆奮發振起之象。卽思狂狷本意也。稱夷惠爲百世師。能興起人。而不及孔子。朱子謂治閭巷危惡之候。姜桂大黃優于參朮。正是此旨。

所取于狂狷者也。只爲興之丹頭耳。

此章原論狂狷。因及鄉原。因及邪慝。邪慝二字。包舉楊墨與諸異端。說客者流在內。故註云鄉原之屬。

章意只是論狂狷。而及鄉原。鄉原者。狂狷之反對也。狂狷似偏。而實近中道。鄉原似中道。而實爲賊。故反經經正。專指鄉原言。至邪慝句。則所包者廣。註所謂並起不可勝正者。日新月盛。其出無窮。而吾學旣明。則衆邪皆自滅熄也。人于經正。或泛說異端。及照邪慝。則反粘煞鄉原。皆未得其義。

典言 孟夫子實見戰國以後士大夫。陷溺已深。不可與入賢聖之道。漢興治法不純。用儒者轉見敦厚。讀萬石君傳。自見唐用詩賦。宋尊經學。士氣愈盛。德業愈衰。明初深見及此。選舉人材。彷彿孝弟力田。多有布衣徵爲尚書者。矯枉如此。尚致後來文弱之弊。孟夫子一眼燦破千百年盛衰氣運。今日舍徵聘而襲制。

舉誠未見其可也。薛武大夫陷溺深不可與入道。正爲無真讀
書儒者耳。漢興之卿陸卽戰國說士也。叔孫通公孫弘閹媚之
徒也。萬石君與其子建慶雖稱孝謹一味阿世取榮。正鄉原的
傳史遷與微巧之直不疑處譴之。周仁同傳深譏之也。然則漢
治之卑正爲用鄉原不用儒者耳。經學明於宋而宋實不能尊
川之故衰豈可與晉之清言同案哉。後來事功人品之壞皆由
學術之不明。制令雖尚程朱而士大夫講學者叛之若讐敵。卽
嘉隆以來講章制藝可見此經不正而邪惡興。釀致生民之禍
制舉雖非不易之良法然實非其罪也。今不明正學術之是非
而欲罷制舉行徵聘吾見一班有錢不識字鄉原彈冠上場耳
曾何補于治道哉。

此章反經以孔子之是非爲宗以入堯舜之道下章卽繼以列聖

相傳之統由堯舜至孔子則反經君子其任固有所屬矣。

孟子曰由堯舜至於湯章

聖人每五百年一興。天地氣運使然。顧天地之氣運亦有厚薄。堯舜湯文皆在上位。是值氣運厚時。及周之衰。孔子不王。是值氣運薄時。天地反承受聖人不起耳。

所知之道一也。時位不同。則其所以聞知者自異。

聞知見知。確自有授受源流。雖孔子不自居開創。

見知聞知之分。大段有不可曉。朱子謂以同時言之。則斯道之統臣當以君爲主。以異世言之。則斯道之傳。後聖當以前聖爲師。大義已盡。近時講學必系師傳。正隆異端密室傳帕之習。不過以此爲標榜招牌耳。實與聖學無干。學者不爲其所惑可也。要知上幾節文勢直注末二句。是孟子歎道統之無屬而隱然有

自任之意。

凡邪教密傳。非大道之公。故必以衣鉢源流爲証。聖人之道。若大路然。不必有所付受。爲支派也。其揆果一。則千歲千里。若合符節。所行所言。天下後世。皆可共質。如其不然。雖親依賢者。門牆於此事。無毫釐交涉也。

孟子生平。頗學孔子。至是已得其傳。是有不得而辭焉者。故雖歷敘羣聖。而語氣只重在末節也。

呂子評語正編卷三十七終


孟子評語卷三十七

平

正編

呂子評語正編卷三十八

楚邵後學車鼎豐雙亭氏編次



中庸

天命之謂性章

首節

歸有光子思子有見于世之學者不知道之所自而以爲無諸已而強諸人也故推本言之**謝**三之謂緣起亦是一部孟子源流。

震川三作其一用意在第三句蓋異說分裂都在教上起彼亦一是非此亦一是非反以聖人之道爲外鑠故子思立說以辨明聖教看上兩個之謂正爲第三個之謂而設其二用意在第一句羣言淆亂總不知天因疑及聖教知天則下面都不錯將下

兩箇之謂都從第一箇之謂貫下。皆有不可易之精思。其三又將首尾二句并入中一句道字。統作一件看。一部中庸只明一道字。故下節卽接道字說去。性者推道之原。教者明道之事。三句總以言道也。只爲首句從天說來。末句從聖人看出。中間率性。又人與物共有。天有聖有人物。故并合不攏。丟開天與聖與人物。但想此道爲吾之所固有。只在吾身一看。則天與聖人人物總在這裏。中庸拆開說有此層次耳。天與聖人卽吾身是。性命與教卽吾身之道是。看到此處。亦先生醋甕翻桶底脫時也。要亦只在因吾之所固有六字看得仔細。便自七穿八洞。上兩句一滾出來。纔有天便不得不生人物。纔生人物便有此性。纔有此性便有此當然之道。一有百有。中間更無停待安排處。故不但命字自然。率字亦自然。命與率皆天之不已。有不得不

然之妙。到聖人之教。似出人爲然。必如此。乃還天命之本來。此聖人之不已。有不得不然者。亦卽天之不得不然也。然此閒却有一折。

羅萬藻文聰明靜恭之德。一自然者。相與動而動之。止而止之。中正仁義之極。一不已者。相與大而大之。小而小之。此時欲強執氣質爲性。而已。毫不能有其氣質。**評**如此說。已落氣質矣。而復云。毫不有氣質何也。且此時何時也。墮地時耶。大悟時耶。氣質不在性外。但不可指氣質爲性耳。**文**天有命。亦天所恃以自生。而以生天之物生人。則源流本合。**評**此却道著。然亦只講得生。不講得命。人生而知覺運動。與氣質萬變。原未嘗不是性。但聖人謂此未是性之最上同然處。惟就這上面看出健順五常之至善。乃天命同然之本。故曰天命之謂性。與孔子繼之者善。成

之者性。孟子道性善。皆一綫印合之理。非有所輕重立說也。**文**
千子專言自然而不言不已。則勢必專以氣質爲性。以甘食悅
色爲性矣。**評**卽自然二字。便有正義有邪說。謂性之善本固有
自然。非由外鑠。此正義也。若謂一切動止無非自然。卽邪說矣。
至不已二字。又是一義。與此處無涉。卽不已亦須分看。指此理
之不已。則正義也。但空說不已。亦可扯入邪說去。此文與中庸
之旨毫不親切。千子之評亦說夢耳。

黃淳耀文立說以原性。子思氏之教立矣。**評**將聖賢書亦看成異
端。造立綱宗作用矣。子思未嘗有教。與孔孟一也。**文**展蟲亦有
報本之性。微鳥亦有摯別之性。而物偏而人獨全。**評**此句中不
分別人物。**文**順性而行。曰仁曰義。**評**將仁義看在後在外。此病
根也。**文**今言其有生以前。則不獨內邪非性。雖仁義亦非性也。

評大錯。此是異學之以無善爲宗也。**文**今言其有生以後則不獨仁義是性。雖凶邪亦莫非性也。**評**此是程子惡亦不可不謂之性意。然程子之云謂性有過不及而爲惡。從惡逆推上去。未嘗不自性來耳。陶菴見處畢竟以生之謂性爲原。以無善無惡爲極。說來說去。不覺流露宗旨。

艾千子翻來覆去。只講後一截天耳。若維天之命。於穆不已。純粹至善處。此最初一截天也。氣質安能雜之。**評**其意祇欲援天字來擡舉性字者。然似云凡人莫非天。凡人事無一非天耳。與性字何涉。與天命之謂性何涉。先不識性字。因不識天字。無論其講後一截天。卽扯最初一截天來。總與題目膠粘不上。

氣質未嘗不是性。然非性之主也。孟子口之於味。章與程張朱子發明理氣之說詳矣。此非孟程張朱之言。孔子子思之言也。今

總一槩不信。只信生之謂性。作用是性。能視聽言動的這箇便是性。三句是真宗旨。所謂本領不是一齊差却。下面縱有一句半句湊合近似。總與這邊道理不相入也。

陳子龍文人或生通神靈。百行懿美。或智昏萬物。質器頑闇。豈天有所厚薄於其閒哉。**文**宋諸聖賢于此辨之悉矣。大樽自不去理會。胡叫喊耳。**文**今吾告之曰。性本無所謂美惡也。於是始知天無可居之功。而命無可怨之實也。善乎莊生冶金之喻。此固知夫性命者也。**評**竟反了孔子。何論子思。告子無善無不善。陽明無善無惡。心之體。直爲聖諦矣。善莊生。正拈出辨香來。**文**天者萬物之主也。而命者不可知之物也。**評**然則命又誰主耶。竟以命字作算。命字解。自以爲新奇。不道徒見其俚鄙耳。總被無善無惡一說惑亂無窮。當時文人學識都如是。天下安得不

亂亡大樽先生君子也。然其所見至此。余故謂後世論人學術。與人品當分看。不得以其人而遂信其說。亦不可以其說槩其人也。

必兼人物言。其理始盡。不知何故。人不肯說著。

率字只在理上說。不在人物用力上說。

率不是用力字。

率性之謂道。原指理氣不雜時。就上句中說。

歸有光文由仁而後有惻隱焉。由義而後有羞惡焉。**薛**惻隱四者

情也。亦所以體道者。不可以貼道也。**文**推之至于水流物生。皆

此類也。**薛**兼物言極精。千子以寬混抹之誤矣。太僕此文不精

細處。在理氣之原。率性是指理上事。而氣在其中。所謂自然者。

謂率字不說工夫耳。先生欲講得自然二字微妙。遂說入化機。

自動不知其然處。不知此只得氣上事。乃二氏之自然。非聖人所言之自然也。

率性之謂道。只說个道理。本然如是。不是生安自然。生安自然。亦是下句中註脚。

羅萬藻文云云。**評**以自然爲性。天以率任自然爲率性。其謬自百出。中庸因言道者淆亂。故以天命率性本原正之。言此外非道也。文止却謂只要率真任性。道不妨各別。不亦異乎。

陳子龍文人道甚賾。然皆性之所有而率之。人何事焉。**評**只可謂率字不假人爲。不是人無事。**文**人之欲爲。天既已爲之而授之。**評**非欲爲。當爲耳。天如何爲。**文**四體之具。未嘗學問。各適所當。豈有所區而分哉。總同歸于安便。以習天道之既備。**評**率四體之性。便有聰明恭重之道。非謂視聽持行之安便爲道也。**文**要

荒之民罔嫻禮義每趨所能豈有所約爲異哉然必同有嗜欲以衍人道于無窮語亦必不能離君臣父子之倫卽禮義也豈專以嗜欲男女衍人道哉語文章情欲俱爲莫遏之勢文明昏濁總屬自然之宗語然則桀跖皆道耶但以無善無惡爲宗則必至於可善可惡可善可惡則善必不如惡之便利矣可畏哉讀書儒者而不明性理反相率皈依異類不至背人道爲禽獸不止天下文士以爲時文游戲耳吁此豈僅時文之害哉

金瓶梅

道可竊性不可竊云云語竊則俱竊不可竊俱不可竊如

君言性卽可竊矣然而非也故不可竊也此篇于子評謂醇疵各半吾以爲大疵而無小醇其所謂性乃無位真人也所謂道則翠竹黃花淫坊酒肆也正希與熊開元論道要得阿難見三十二相與攝入姪席時謬妄相等卽是此義不知其所謂性自

欲率之而不可以率者也。但看大善知識其所作爲定顛倒。則其所見之性。決非聖賢所謂天命者明矣。

性字非氣質之謂。率字非徑遂之謂。

看率字清。則性字清。氣質之性不可率。不可率者。非性之本然也。看道字清。則率字清。日用當行之路。卽有不行。路未嘗不在。不行者。不過在上面過不及耳。故曰可離非道也。不可離者。率性故也。

脩道之謂教。此一句是子思全部總敘。上二句是此句楔子。此以下至終篇。皆所以脩之法也。故此句須直承第一句說。禮樂刑政。卽是天命之性。告子陸子靜王伯安以能視聽言動爲性。只爲脫却第一句。看仁義禮智。都是聖人強名設教。初非性中固有。卽老莊割斗折衡之旨。不知正因能視聽言動之性。非天性

本然率循不得。故煩聖教耳。彼所謂性道。乃聖人之所欲脩去者也。若單承第二句。便墮此義。

世總文

道之原在性。天之所以與我者也。顧人繼天之事。亦當

使人與有功焉。

論

說來百懈。便無聖人也得。

文

古聖人治天下。

使天下無勉強之難。而亦不全與以自然之易。

論

說來百懈。便

勉強也得。自然也得。其實不勉強爲得。且如何全與。今試與之

看。**率**性固道矣。道之中猶有差忤也。**論**道如何有差忤。人之

氣稟不同。以有差忤耳。

文

率性皆道也。道之理亦不當若是多

異也。

論

率性之道。那得多異。彼蓋認氣質爲性。故以爲率之亦

多異耳。○只爲氣質有偏勝闕欠。便不能完此理之固有。故聖

人爲之品節而裁成之。不則天命或幾乎息。而道不行于天地

之間。此是聖人不得不然者。不是人欲有功于天而爲此多事。

也。勉強自然。亦皆本乎天理。聖人亦有不得不然者。非聖人能與之。而易之難之。惟吾作弄也。他總見得真性以外。一切是假合。故毫無親切之義。

脩字只在過不及上說。

人生品質各異。非過卽不及。不能中道。所以有聖人之品節。乃所謂脩也。

惟聖人窮理盡性至命。故能立天下之極。天下人物細微無一不備。聖人性道中。聖人原只在自己分上設施。未嘗外假也。

艾子子自記中庸所謂天命之性。乃指維天之命。於穆不已處言。此孟子性善之源也。此指最初處言。尚未落陰陽五行氣質雜糅處。到脩道句。乃有氣質之性在內。若曰天者自然之謂也。此說出於道家。夫使天無於穆不已爲之主宰。而徒以氣機激盪。

爲自然。則桃當生李。牛當孕馬。草當成木。人當胎禽。何緣春夏
秋冬。飛潛動植。終古不易。**評**自記甚當。然謂天無爲自然。猶有
一半近似。至其文謂教爲聖人有爲。不得不然之機權。則全謬
矣。教雖聖人所爲。而因吾性道之固有。則亦同是自然之理。三
句一串說下。中間只多氣質過不及一轉。聖人之教。與天命之
性。原無二理也。

又自記此節註雖兼人物言。然玩脩猶品節之也。則就人言處
爲勝。不必以裁成輔相。將物字講過半也。且恐作成盡人物之
性。贊天地之化育題耳。**評**照註兼人物說。本等不錯。忽又自疑
其非。所謂見處不的也。穿牛鼻。絡馬首。水耕火耨。斧斤以時。數
罟不入。何嘗不是品節。卽似盡人物性。贊天地化育。理本合一。
又何礙乎。

性道本不可分。但性上著不得修字耳。實則修道而性復在其中。看註云性道雖同。氣稟或異。則上二句一併注下此句。全部中庸。只完得修道之教也。

程子謂自天命至於教。我無加損焉。蓋道在天地間。人自不行耳。無存亡也。剝於上。復於下。桀紂所不能止息也。道如是。教卽如是。聖人之旨。亦至今歸然也。害道者曰三教。教豈有三乎。則又從而甚之曰三教合一。嗚呼。其所謂三者。釋也。道也。秀才也。而無聖教也。其所謂合一者。釋也。道也。秀才也。亦釋也。而無聖教也。聖教遂亡乎。天地自若也。日月自若也。山川自若也。無存亡也。

自天子至庶人。同此道也。孔孟之後。有儒名。則天下自外于儒矣。程朱出而有道學名。則天下之儒。又自外於道學矣。郝伯常謂

道學之名立。異曰禍天下。必有甚于宋者。理不爽也。今人譏詆腐陋者曰道學。而村夫子點講師亦公然自命曰道學。則胥天下而外于道矣。不知堯舜禹湯文武周公皆老儒也。道學先生也。則何儒與道學之有。

作君作師。教無異官。官失其職而有孔孟耳。禮樂刑政。教無異事。事失其治而有講述耳。

以道學立傳。古未有也。自脫脫作宋史而名立。道學於是乎亂。此等書不會究心。程朱之說。開口便錯。近人抄記得蒙引存疑等講章數語。便自以爲程朱。一經辨駁。磕著粉碎。一場沒理會。少閒不得。不走入差路去。只看所讀所做文字。與這個異。但是口頭道得。筆下去得。紙上寫得便了。不道是生員切已事也。

道也者節

言言卷三
道也者起便單說道而性教在其中。此子思之意。非臆解也。

道不可離。因爲從性命。中與生俱來。非由外鑠。我雖不明不行。道却未嘗頃刻離我。離道者至桀紂而止。然道終未嘗離桀紂也。此雖承上注下轉接語。却是中庸絕大關鍵。下十二章至二十章。皆發明此句之義。須從性命。中說出。所以不可離之故。纔見人自是不戒慎恐懼不得。若但將大擔子壓人。責人承當。非不與下意相照。却看得不可離三字。已不著痛癢矣。

戒懼是統體工夫。兼動靜言。

工夫只是無閒。前後際如一耳。

此是君子統體操存心法。就盡頭形容其全身。不覩不聞而戒慎恐懼。則無時不然矣。

不覩不聞。是舉常存敬畏之盡處而言。見于此亦戒慎恐懼。則無

時無地不然可知。看註中雖亦二字語脈可悟。自禪學亂儒以不覩聞爲真體。遂謂君子專於此用工夫。聖學日湮矣。必從覩聞說到不覩聞。斯理方圓實。吾道精微處。異端心粗自不能入耳。

歸有光文心者道之會也。心存而道與之俱存。心亡而道與之俱亡矣。**評**如此說心字。纔是聖學。異端便指心卽道矣。

莫見乎隱節

上一節工夫是總冒。此節是細分緊關。分明兩節工夫。若作兩對說便不是。不覩不聞乃語言之妙。爲包括覩聞以形容敬畏之盡。非謂專于此做工夫。亦非謂工夫到此乃妙也。慎獨節在交接頭上用力。獨就時地上看。非心中另有此件物事也。

工夫鑿然兩節。但上一節是總段工夫。此節是逐處緊要工夫。提

省界眼。有此兩節。做時原只是一片。不曾拈一放一也。
上節是統體處。不專說靜。此節是分界頭上。亦不專說動。
戒慎恐懼。是兼統動靜工夫。此節則自靜之動。分界之幾也。時文
與上節對分動靜者非是。

隱言暗處。微言細事。俱在機候上看。註中的確分明。人多將隱微
說人心境秘密處。卽近世獨字下加一體字。以爲宗旨之謬妄
也。故其語意又似誠意。又似致知。自指劃一番道理。于中庸本
義不知說甚。

陳子龍文云云。**評**隱爲暗處。微爲細事。皆指境候言。言此時此地
似人所難見。然幾旣已動。自家先見得分明難掩。已是莫見莫
顯矣。今將隱微講在心術上。又以陰險祕巧當之。則是隱微定
惡。而顯見定善也。隱微亦有善。顯見亦有惡。豈得獨抹壞隱微

乎。

楊以任文夫人五官皆爲天用。百動皆爲命移。惟隱微之際。冷然自知。可以用天。忽翻一念。可以衡命。不的。冷然自知。仍爲天用。忽翻一念。仍是命移。君子正求合天命。未嘗欲用天。衡命也。莫見莫顯。只在當下。獨知中言。非指隱微之必至於顯見也。此節與大學十目所視節。人每說錯。

誠無爲。幾善惡。人生而靜。但有至善。感于物而動。然後善惡形焉。惡之生也。其在動之微乎。故君子慎獨。審其機也。此二句卽十目十手其嚴之意。見幽獨之可畏如此。莫見莫顯。正指隱微。非對待推極也。

慎獨是動靜之交。不可竟說是動。

慎獨只在動靜之交。接處又加謹耳。蓋此是惡初生處。斬根須在

此也。獨只是已意已發而人猶未見。故朱子謂對衆人時亦是獨。

問餘選評云。靜存動察。是學者入手兩事。然究極之。善動實本于善靜。世之善處靜者。只是氣機偶息耳。而亂動之根本未嘗泯。試以晝夜驗之。人心無事時。比有事時爲靜。而睡則尤靜。人心有一掛念躁想。則睡不去。無聞見思慮。寂寂寧機。此靜境也。而夢中顛倒昏亂。一點靈性爲濁氣所掩。渾如死人。則可知日間靜時之靜。亂動之根本未嘗泯。如龍谿所謂日間養得清明。夜間夢亦清明。日間攪得昏雜。夜間夢亦昏雜者。以此靜驗彼靜。昭然可見。夫人之一心。夢中尚不能自主。矧疾病乎。疾病尚不能自主。矧死時乎。思及此。未有不惘然自失者。學道者試參之。其說何如。曰。工夫確然兩節。然却不是動靜截然兩對。戒懼是

統體慎獨是細分。於關頭緊要又加謹耳。若截分動靜是斷綱。開時反不用戒懼耶。聖學隨動靜做工夫。使此心敬謹凝一無閒耳。無惡動求靜之理。曰周子之主靜。程子喜稱人靜坐。非歟。曰此非彼之所謂靜也。動靜有就理言者。有就氣言者。有就時地言者。周子之主靜以理言也。正恐人錯會。故特下本註云無欲故靜。程子喜人靜坐。喜其人內求不外馳耳。亦非以靜爲教也。若龍溪之所謂清明昏雜。却只就氣上立脚。二氏之徒稍有工夫者。卽能於死化疾病睡夢時。了然不昧。他便道是極頭。士人亦以此惑之。不知此只是氣上事。所以他這些子。只好在靜處玩弄。纔到動處便擾亂。用他不著。故分動靜爲二。而惡動而求靜。可知他清明之時。其昏雜之根。本未嘗泯。故聖賢勿貴也。若周子之主靜。卽程子所謂動亦定靜亦定。廓然而大公。物來

而順應酬酢萬變而主宰嘗肅。故其靜非晝夜昏明之可擬也。學者知此。則彼說之不足參自明矣。

此章從天命大原一直說下。故慎獨在戒慎恐懼後。若學者下手次第。却須先從慎獨做起。看末章自見。

喜怒哀樂之未發節

歸有光文。夫人之所爲心者性情而已。而天下之道在焉。**密**異說。則云所爲性情者心而已。

和易見中難說。故中字就喜怒哀樂四字而指其未發爲言。借有象以明無象。猶孟子就惻隱羞惡辭讓是非之端而指仁義禮智之固有。故由和見中。由中達和。不爲混亂。若俗說謂已發一。如未發見和卽是見中。此却是胡謔。兩件都不懂也。喜怒哀樂借來說性。猶孟子之以乍見說仁。都是實有。

健順五常是性卽此性之具於中而未動處謂之中。與太極之無極相似。非性之上另有一件中。猶之太極之上非更有無極也。異學指心爲性。以生謂性。必去理而尊氣。遂認仁義亦屬後面事。而於上面別指其虛活難言者當之。不知此却是仁義下面東西也。這裏正須明辨。

章世純文云云。艾敬子未發之中。自戒慎恐懼來。使無戒慎恐懼工夫。則發必不能中節。發不中節。則常其未發。非中也。如人之病瘧。當其未發。瘧症常具。可以謂之中乎。且未發性也。非時也。如以時。則人有未發之時乎。惟有昏睡耳。然夢中亦有喜愠矣。大力認未發作時。是以有浮遊罔象不盡絕之說。圖千子硬主要根戒慎恐懼來。故其言如此。若必待戒慎恐懼而後有中。則亦將必脩道後。而有天命之性乎。瘧者病也。不可以喻本來臟

腑之中和也。如其言瘧之病。必待服藥而除。病除然後臟腑有其中和。是已然則不病瘧之臟腑也。須服瘧藥而後中和乎。其說之謬。不待辨而知。不足以評大力文之是非也。第大力文所言未發。乃禪家前後際斷。萬象森羅。空洞無外。虛白清鏡。火珠靜月之見。與俗人平旦夢覺。懵然無知之象耳。非中庸所謂未發之中也。學者於此細體會之。自得。

歸有光文云云。**艾子**子此文膾炙人口久矣。然吾終病其于戒懼慎獨上欠一截工夫。蓋此養成性體。非偶然合節也。**評**子子于此節書。看得鹵莽。硬主張要根戒懼慎獨。故其言云爾。後且從而和之。真吠聲之類也。此不指養成性體。亦不說偶然合節。是言人心性情之德。其本來道理如此。偶然者豈能皆中。養成者卽下致字中事。養成乃復得此和。非本然之和也。太僕文之佳。

正在中節處說得自然。人皆有之耳。其後不佳。坐回顧未發。他作謂已發處卽是未發。已屬牽扯混話。此却謂不得不發而未發。本體不與之動。更不成道理。如此則性情有兩件作用。而所謂發者卽屬妄緣。所謂中節亦涉外假矣。此則太僕過高中疎處也。

文云云。卽已發內有未發。是野狐禪亂道。雖發而本體乃寂。是外道打成兩橛話。學者奈何粗淺至此。此說原于陳湛以慎獨獨字爲心體之妙。皆聖經之蠹螭。學者不可不辨也。

金聲文人之生無不自天來者。一入于天下而順之有喜觸之有怒。云云。**文**生卽入矣。天下非天乎。何惡乎其入也。且問從何日入來。**文**未喜未怒未哀未樂。固卽其能喜能怒能哀能樂者。**評**二語好。然能字卽是病根。認作用是性也。**文**或喜或怒或哀或

樂乃卽其應喜應怒應哀應樂者。評應字便的當然。他說應字却從心起。文以未發爲發。而其所發之地。仍與萬物相忘于未發之天。評互說極混。他只要打成一片說。要之發而皆中節五字。卽非其所喜。文役于喜怒哀樂則失性。離于喜怒哀樂則終無性也。評二語未嘗不是。而其所主却差。其大謬總從告子生之謂性一句得宗。不覺弊病百出。所謂差之毫釐。謬以千里也。鄒弘文道之名大著于天下。而中和之謂。亦可以不立矣。評性教中和等。本固有之理。聖賢爲之分別指示。非不得已。強立名目也。由斯言將道亦強名。不至無善無惡。不立文字不止矣。文人于平實少理會。則必求之過高。以自大。纔求高。卽浸淫于異說。而不自知。多此弊也。

徐爲儀中卽性也。和卽道也。有謂未戒懼慎獨止可謂性。可謂道。

不可謂中謂和說本大全小註及艾子定待然似岐。性道是人物各得之總理中和則人心中自然性情之德謂中卽性和卽道亦籠統在未戒懼慎獨止可謂性道不可謂中和此直是艾南英亂道大全亦無此說惟問朱子者有心存而寂感無非性情之德一條及陳安卿云須有戒懼工夫方存得未發之中須有慎獨工夫方有已發之和數語皆就學者講工夫已是致字中事言中和雖固有之德然不致亦不能有之耳非解中和本義也如艾說則下文致字又如何著落依他道則應云致性道不應云致中和矣或云艾意謂致此中和於天地萬物是推極其用之意曰然則應云中和致於天地則位致於萬物則育耳亦不應云致中和也總之亂道則不特理不通文亦通不去矣。

千子解此節必根戒懼慎獨。最爲不通。渠云中非戒懼何以能爲天下之大本。不知中果必從戒懼而有。則或有或無。或全或虧。亦何以爲天下之大本哉。蓋渠將天下字看作功用。故其謬不可醒耳。

千子只誤看天下二字。爲此二字所震。便不難遷就書理以湊之。不自知其眼孔淺心竅粗也。天下之大本達道。總只作一箇道字看。

艾千子謂不根戒懼慎獨。則不可謂天下之大本達道。只誤看天下二字是張皇字。不是切實字耳。乃云若槩指心體。則常人皆大本達道矣。未聞常人皆能位育也。則其謬更甚。常人原皆大本達道。原皆能位育。但不能致中和耳。又云禪宗盛行。乃有不由工夫直證本體之說。此亦不然。中庸言道體處甚多。非必說

工夫也。禪宗亦自說工夫。但自有彼之本體。彼之工夫。非吾之所謂本體工夫也。至謂楞嚴之理甚微。可存作性命別傳。不可強入四書。餘姚以之講學。未嘗作四書講義。然則千子之視異說。原可以並存。但不可作時文用耳。是千子不特不知佛與餘姚。原未嘗知章句。不特不知楞嚴良知之學。原未嘗知時文之可以明道也。

既戒慎而後。可名曰中和。則中和二字中。已有致字矣。下致字。不幾蛇足乎。

致字工夫。上面兩節已說得精盡。只消直接位育二句。而中庸又特下喜怒哀樂一節。正見性情之德。具於人心。人人所有。初非異事。而極其功。卽至位育。其示人之意深切如此。

致中和節

離第二三節講致字者。邪說也。卽第二三節是致者。淺說也。註云。自戒懼而約之以至於至靜之中。無少偏倚。而其守不失。自慎獨而精之以至於應物之處。無少差謬。而無適不然。可知有多少次第境界在。

致字若說得自然。連上節都錯。但說下手一節工夫。怎便到得位育。若不是君子。豈容易至此。但粘煞君子現成身上。又不是緊接上節吃緊爲人語意。蓋中和只是此中和。工夫亦只是戒懼慎獨於戒懼慎獨中。做到積累純熟極盡處。纔叫得致。纔有位育效驗。若云君子戒懼慎獨天地位萬物育。卽粗疎矣。

致字是就戒懼慎獨積累純熟到極盡處。方有此效驗。

致字從戒懼慎獨推至于中和之極而言。若未到極處。有一分中和。亦必有一分應驗。但要到位育。則非致極不可耳。俗解似一

戒懼慎獨便了。全無實際。安得不以位育二句仍納入性體中胡說乎。不知註中自戒懼而約之兩段中。工夫層級正存在。以位育爲盡頭實證耳。

上一句是工夫盡頭。下二句是效驗盡頭。分明在事上說。註中天地萬物本吾一體。是在題前提明所以然之故。不是仍歸結天地本原也。時文每云。吾性中之天地位性中之萬物育。皆墮魔界。但亦有致中和而位育之功不盡者。此又係時位爲之。故朱子曰。但能致中和於一身。則天下雖亂而吾身之天地萬物不害爲安泰。其不致者。天下雖治而吾身之天地萬物不害爲乖錯。其間一家一國莫不皆然。曰。吾身之天地萬物。卽實指天地萬物。非懸空語也。然須知此節大旨。是推盡聖神之能事。學問之極功。位育二字。究以平成。咸若爲正。如射者之的。行者之歸。

正聖賢接引之意莫淺小看却也。

位育是實事。不是懸空影響。如二氏寓言。註中天地萬物本吾一體六句。乃推論所以相應之故。非卽此是正義。了百了也。時文誤認此意。反以實事爲粗。要將位育倒縮入內來。不道求精得粗。只爲忘却故其效驗。至於如此八字耳。

位育是實地效驗。偏要說入性中。真說得三界唯心。總不是中庸境界。

實見得天命原頭。天地萬物總作一例看。無非本分內東西。位育二字。只在日用證明。不是叅虛頭弄大話。始得。

位育是實事。此理先信不及。不得不倒說入空虛去。只看末世做擾汨陳災沴天厲。上下咸失其所。不可謂非聖人之咎也。若得箇聖人出來。從頭經緯一番。其氣象又何如。若謂今日天地萬

物未嘗不位育。卽是漢唐以後之天下未嘗不三代。不知聖人
之所謂位育。不是此境界。所謂三代之天下。亦不是此境界。讀
書人胸中。須先有此境界始得。

育世純文云云。**評**天地位句信不及。只有萬物育還好。講人功。於
是只在這上面說。於是只說氣。只說萬物育。便是天地位。育萬
物。只說幾箇蟲蝶。位天地。只說幾箇節令。秀才淺陋至此。只坐
以理學書爲迂腐。不去理會故耳。

照定註中心氣二字詮發。位育方有个著落。位天地。育萬物。與天
地位。萬物育。分別焉字義解入微。方是千了百當。

兩焉字極有理會。不是如何去位育。亦不是他自然位育。只看日
星災變。山川崩竭。人物妖異。天下有道自稀少。到無道時自頻
多。天人相與之際。非偶然也。不然。以法推之。何嘗不是一定之

數。又何必修省補救乎。

戒懼以致中。慎獨以致和。故位育分屬。此對待之理也。戒懼兼動靜。慎獨在動幾。猶敦化之於川流。故萬物統乎天地。天地又統乎天。此一貫之理也。

仲尼曰。君子中庸章

首節

仲尼曰三字。是萬世之公。若徒作尊祖義斯淺。

君子之中庸也節

金鑑文 道統之亂也。吾未懼于入小人。而先懼其出君子。**評** 君子

之中庸也句。其實止與小人對勘耳。出君子便是入小人。更無

中間一種。**評** 天子題止如此。**評** 題止如此。而文能副之。則是先

民第一種文字。吾所不愜者。正恐題未必如此耳。問如何見不

如此曰。小人之中庸句。明註小人之所以反中庸者。看此文意。要將小人說高一步。不欲增反字。便是不如此處。曰。此是看對面不同。曰。對面不同。則正位亦走樣。細體認自見。君子之德。兼性學說是。

看註中君子曰德。小人曰心。則德字自兼質學講矣。

君子以德言。後來學者都在此住了。須知這上面正難。

湯霍林君子時中。分兩層不得。然又不得合講。**許**白文明下而字一轉。故註中特以又字清之。如何分兩層不得。此正講圓融悖傳註之說也。

陳子龍文以時中爲用。則先貴于立本。**評**此章引聖言以釋中庸其意注重時中。文却倒縮重君子於理無礙。實失章旨。蓋中庸所謂時中。乃從戒愼恐懼而得。於君子又進一句說。故加而字。

一轉。所謂君子而處不得中者有之也。大樽將時中看做君子應用機權。故反輕置耳。

時中二字拆不得。

君子只是說个好人。時中只是說个做得恰好的事。無忌憚亦只是不中庸耳。語語射定無忌憚講。方見重而字。時文多放開說。隨時脫却戒慎恐懼。已落無忌憚船去矣。

君子不頓斷。而字一折不分明。而字不出。時中卽不從戒慎恐懼得來。不從戒慎恐懼說時中。卽與下無忌憚無關會矣。

時中與無忌憚正相對。中字本天來。不本心來。惟君子無時不戒慎恐懼。故能隨時處中。若但作達權通變作用看。却正是小人之無忌憚。小人也不是一味狂獷。他也見一種影子。只是憑心起義。不知天命而不畏也。雖倖成事功。已離天則。他何嘗不自

以爲時中。所謂本領不是一齊差却也。

時中正對無忌憚。若將戒懼意講入君子二字。而下載只道得个時字義。亦解題未精融也。

只加一箇時字。便藏得箇庸字。註云中無定體。隨時而在。是乃平常之理。正還庸字下落。若只作因時爲變。不討得戒懼源流。卽是後世講作用學術。未有不流于無忌憚者。中字兼中和。時中兼中庸。中字根戒慎恐懼。方是一滴歸海。水屑不漏。

時中註有二意。曰隨時處中。是逐時戒懼。就君子自修說。曰無時不中。是統體戒懼。在現成看君子說。

徐爲儀君子之德。是戒懼致未發之中。隨時處中。是慎獨致已發之和。小人反是。非以時中爲戒懼。照下無忌憚也。照無忌憚。當以慎獨對耳。說約按註。君子知其在我三句。是時中上一層話。

推原其平日也。而無時不中一句。方是正說。小人不知一句。對君子知三句。不戒懼意已在裏面。則肆欲妄行二句。對無時不中一句。不可以無忌憚對戒慎恐懼。存疑說是。又爲通之。此解最確。**評**註先下中無定體。隨時而在。然後云君子戒慎恐懼而無時不中。先講時中之理。而後說君子之所以時中。則戒慎恐懼。正解時中以對照無忌憚。非推原平日。林次崖顧麟士之說皆誤也。蓋時中只在事理上看。卽首章第二節註中所謂日用事物當行之理。無物不有無時不然者也。惟戒慎恐懼。乃能體得此理於已。無時不中。卽所謂常存敬畏而不使離於須臾者也。故程子朱子皆只說戒慎恐懼。而不及慎獨。然有意在慎獨。只說事幾交接頭上。尤要加謹。戒慎恐懼兼動靜統始終而言。時中者。無適而不中。亦是統體說。不指交接頭說。故謂君子貼

戒慎恐懼而時中貼慎獨。不可以戒慎恐懼對無忌憚者皆誤也。

子曰道之不行也章

人莫不飲食也節

此如詩之比體說飲食便是說道罕譬而喻神味無窮纔見指點領會之妙。每見近文通篇某講道字。複疊上文至末略點意趣索然。或則飲食與道夾說則已分而爲二。非比喻體也。下流有實做飲食是道者。又癡人夢語。不直腹痛矣。

陳百史人莫不飲食書法與此天地之所以爲大政同。若必從飲食轉到不知道。又礙數層矣。贊天地正是贊仲尼說不知味。卽是不知道。**國**正復不同。彼是以彼譬此。此是以小喻大。仲尼天地分明兩大。說天地卽是仲尼。故補仲尼成蛇足。飲食與進

分不得兩件。然竟說道不得。卽就日用中舉出一件以譬全身。言外有結。所以不明行意。故必須轉出道來。正在層次賓主分明耳。陳說非是。

雖不知味。究竟飲食當飲食時。其味自在。何嘗離得。只人自不去領略。便失之耳。程子所謂飯從脊上過也。飲食是日用。味只日用中道理。此等指點最親切。是比喻。却不是比喻。兩也。字意味深長。其音未寂。試緩念之。便得明道言詩之妙。若將道字夾和譬說。或于題外另講。不是對增說相輪。卽是畫蛇添足。語脈盡失矣。

飲食喻日用。飲食之味乃喻道。人都混過。上過不及。乃道之所以不明不行。此不知味。乃人所以過不及之由。上智愚在知行之知說。此知味在覺察之知說。能覺察。然後能知行耳。人亦都混

過。

知字非知行之知。統明行而言。乃提撕省覺意。卽孟子所謂弗思耳矣也。

子曰舜其大知也與章

中庸引夫子之言。以明行道之必本乎明。乃此章大旨。

此章是言道所以行之故。卽可悟大學知止節。及孟子智譬則巧節之理。

此根前章知者過之而言。知如舜。弗可及已。然其所以大者。則以其不自用而取諸人。其知而不過如此。全重過一邊說。然又須知執兩端用其中。非聖人之權度。親切不差。何以與此。則無不及不待言矣。

知得一分。行得一分。知有一分。不到。則道有一分不行。此行道之

必出乎智。而智必求其大也。一人之大有有限。合天下之善以爲智。故大不可量。此舜之大足以爲法也。

明道必須知。知必不自用而取諸人。此中庸意也。以舜之知。然且不自用而取諸人。所以爲大知。此夫子意也。要之舜之生知而又如此。故成聖人。學者但能博學審問慎思明辨以求知。亦可以至聖人。其歸一也。看註非在我之權度精切不差。何以與此。若說舜止靠此以爲知。又抹去聖人界分矣。須兩邊說透。

惟大知能取諸人。亦惟取諸人而智益大。

舜本自知。又能合天下之知以爲知。故曰大也。問察四句。正見其大處。非舜之所以爲知處。看註云非在我之權度精切不差。何以與此。便得此意。時文竟似舜單靠此以爲知者。誤矣。

舜能不自用而取諸人。所以爲大知。然其所以能如此者。舜固自

有其知之本也。而又擇之審如此。此其所以大耳。非全無已知而恃人以爲知也。看註中然非在我之權度精切不差。何以與此二語自明。

其不自用而取諸人處。都有聖人本分在。不是單靠衆人也。其好問好察。隱揚執用。不是大智。如何能有此精切不差之權度。但有聖人權度之精。而又必不自用而取諸人如此。此其知之所以尤大也。

舜好問而好察。邇言。此舜字卽統下四句。與末句作呼應。若粘住本句便非。

此章重行處意多。四句直注到用中方住。好問好察。只收拾得中之作料耳。

問察只是無遺。

歸有光文取善貴公而不能精者亦同歸于私而已矣。**評**此言甚精。可見好問察邇處便是聖心之知。

兩好字難。正是舜之所以大智處。

問察以成大知。無不解道。正惟大知故能好問好察。此一層不透。則兩好字無精神。亦說不著大舜身上。

好問察處正是大知。說做疑了問。不是舜之問。說做沒緊要問。又不是舜之好問。

四句逐節蛻出。問之中。雖邇言必察。是蟬聯兩層。若看做平對兩件。而字便不透。

邇言中正有善惡在。善之中又有兩端在。下文一步緊一步。

陳子龍文持善惡以用人。云云。**評**善惡指言。不指人也。若人之惡者。則四凶堯所未誅。而舜誅之。聖讒說殄行。侯明撻記。象刑惟

明豈得隱哉。不自用而取諸人。亦謂用善言。非用人也。不體認註義。都成亂道。

執字極方。須看得圓。兩字極板。須看得活。端字極偏。須看得全。

兩端都只是善邊事。於此擇取一中。乃所謂至善也。執是衡辨之意。

惡者已隱。則兩端皆善也。擇其至善者。卽中矣。非兩端之間別有中。亦非渾化兩端以爲中也。

此兩端不是兩頭。只兩樣相似。皆善也。於兩樣中審擇其至善之一。卽謂之中。非卽始暨終由小推大之謂。混論語無知節兩端義不得。彼兩端有中間。此兩端無中間。

兩端都是善言。其惡者已隱矣。卽善之中而有兩端之不同也。中卽就兩端而擇其至善者用之。非調合兩端而爲中也。

用中不是參和

執是執。用是用。若謂不必分析。不但不識文字。并說壞了道理。自己憤憤猶可。直是誤人不小。

聖人所以不自用而取諸人。只爲中無定體。恐有未盡。而求之衆人。邇言正爲中不離庸也。可知道只得中庸。大知乃所以行中庸。此作傳微旨也。

歸有光文中道散于天下。惟擇之審而行之至。則天下之中。聖人之中也。子靜伯安不肯此句。故終身墮魔外而不悟。

子曰人皆曰予知章

陳子龍文云云。此章重下半段。見明道必須智。然必仁能守而後見其智之能擇。以起下拳拳服膺勿失之義。上半段乃比興體。與中庸之明行無關係。卽上半予知。亦不過自以爲察知禍

患耳。初無以智害人而反受害之說也。

知水火不可犯而姑復犯之者。究不知水火也。知烏喙不可食而旋忽食之者。終不知烏喙也。

子曰回之爲人也章

正爲上章能擇不能守者指示一個樣子。與舜大知章同例。呆贊顏子。便失其理。得一善。正見顏子所擇守無非中庸。不是著向一善上說工夫下手也。

得一善只是一二之一。有將一字說入玄妙者大謬。一善說得太玄奧者固非。一善說得太輕率者亦非。服膺不徒是心上記得而已。

子曰天下國家可均也章

道是中庸却說不可能。則過者止矣。道是不可能却只是中庸則

不及者跂矣。反覆玩味言外之神。方恰得箇中之意。

子路問強章

子曰南方之強與節

一望三與字平也。然翫抑字語氣。則而強與南北之強。自見側勢。又細翫南方之強與北方之強。又自有側勢。此無他。只緣意中先有一子路在。

故君子和而不流節

和與中立與國有道無道例看。不重。重在不流不倚。下半櫬。乃是君子之強處。

歸有光文云云。又千子時文以致中致和爲此節和字中立字。滿紙可厭。存此正之。立言自有淺深。道理初無內外。如此節和與中立。自與首章中和迥然兩義。牽扯附會不得。先儒之說具

在千子之評甚正。後有評云中和無兩義。此從涉世言耳。漫從粗淺處說起。恐涉末世黨錮時節義餘論。故必須說本體。此種謬論。直是強作人言。既曉從涉世言。則不當從本體說明矣。惟其從粗淺處說。而強之本體精明醇切。乃見談理之妙。如此卽涉末世餘論何害。若必以說入心性爲內爲精。以事物世故爲外爲粗。則全非聖賢道理。最是不通秀才見識。

時文不通。使學庸白文。竟重用一字不得。如和與中立。與中和之義。何涉。而近文每見搏攢。不知此中立二字不可拆也。

強之矯。重在下半截。而字不透。則大意不得。中立與不倚。都看做一片矣。

兩而字有分看。側串看。合併看。顛倒看之理。

曹原

流有二弊。知人之不足禮也。而故諧之。其流爲玩世。知性

之無可制也而故逸之其流爲蕩情評晉人高處總不出此弊而陸沉由之至今中于士大夫之心而塗毒生民者也

中立尚有私見客氣在

子曰素隱行怪章

首節

金鑑彼蓋以平淡無奇之說不足聳一時之聽聞也而必出于非常可喜之論評後之著書立說以簧鼓一世者其心曲被此道盡

告子遺說至宋而忽猖子靜一宗至明而大熾告子子靜當時幸有孟朱闢之力辨之明然且後世有述如此若良知立教至今曾未有孟朱者出雖困知記讀書劄記象山學辨閑關錄學部通辨諸書未嘗不指斥其非然皆如蜀漢之討賊其號非不正

而力不足以勝之。其流毒惑亂正未。知所屆耳。願天下有識有志之士。共肩大擔。明白此事。

君子依乎中庸節

依乎中庸句。緊對索隱行怪。或承遵道。或雙承上二節。皆錯也。中庸雖兼過不及。然却只對過一邊說。看註中而已。語氣自見。依字是不離此做工夫。戒懼慎獨。正在裏許。

總結上兩節。註中雙承甚明。依乎中庸二句。平分直下。唯聖句。總對弗爲弗已。白文語勢亦甚明。自胡雲峯倡說側重遯世句。乃云依乎中庸。未見其爲難。將兩句強分難易。他看得依乎中庸與遵道而行無異。直是心粗。不知聖學大段。全在依乎中庸內。遯世不見知而不悔。正是依乎中庸達天自得之妙。兩句難說。不得一分輕重。連遯世不悔。亦不切聖人分上矣。

唯聖者能之。卽所謂中庸不可能也。對照上過不及兩節。緊承上兩句。乃見能字全理。註語甚分明。若只贊不悔遯世。何足云唯聖能乎。

自仲尼曰君子中庸章至此。爲一大起結。總以明中庸之義。言過言不及。中庸之所以失也。言知言仁言勇。中庸之所以明而行也。知必如舜。仁如顏淵。勇如子路。分言德之成也。統知仁勇之全者。其惟孔子。故開端以民鮮能起。此以惟聖者能之結。照應分明。中間鮮能知味。起舜之大知。不能期月。守起回之爲人。中庸不可能起。子路問強。皆一能字作線。直至聖者能之能字。總收以仲尼曰起。言中庸爲孔子之教也。以此章結。言必孔子而後。謂之能中庸也。故此章純是說孔子。不是泛講過不及兩種人。與空贊君子也。上兩節重在吾弗爲。吾弗能已兩句。若三節

末句颺開。却正是孔子全相。收拾上八章。過不及知仁勇在內。他人轉說轉遠。似于前而數章作複剩語矣。

呂子評語正編卷三十八終

呂子評語卷三十八

中庸

毛

正編